

Gradačac, 20.12.2011. godine  
Broj: 648/11

**ZAPISNIK I ZAKLJUČCI**  
**SA SEDAMNAESTE SJEDNICE PREDSDJEDNIŠTVA SKUPŠTINE**  
**SAVEZA OPĆINA I GRADOVA FEDERACIJE BiH**

U Gradačcu je dana 20.12.2011. godine održana Sedamnaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Skupštine Saveza prisustvovali su:

1. **g-din Vlado Alilović**, načelnik Općine Vitez, predsjednik
2. **g-din Ermin Hajder**, načelnik Općine Bosanski Petrovac
3. **g-din Salem Dedić**, načelnik Općine Jablanica
4. **g-din Rasim Omerović**, načelnik Općine Kalesija
5. **g-din Luka Jurić**, načelnik Općine Odžak
6. **g-din Hakija Osmić**, načelnik Općine Zavidovići
7. **g-din Miroslav Živanović**, zamjenik gradonačelnika, Grad Sarajevo

Pored gore navedenih, sjednici su prisustvovali i: **g-din Fadil Imširović**, načelnik Općine Gradačac, **g-đa Vesna Travljanin**, direktor Saveza, **g-đa Dragana Solaković**, pomoćnik gradonačelnika Grada Sarajeva, **g-đa Mihaela Godžirov-Savičić**, predsjednica Udruženja pravobranilaca u Federaciji Bosne i Hercegovine, **g-đa Valentina Savičić**, Udruženje pravobranilaca u Federaciji Bosne i Hercegovine, **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Elvira Imširović-Bolić**, viši saradnik za pravna pitanja, i **g-đa Dženita Kovačević**, viši saradnik za finansijska pitanja.

G-din Imširović u svojstvu domaćina pozdravlja prisutne i izražava zahvalnost što je Gradačac odabran za domaćina Sedamnaeste sjednice Predsjedništva Skupštine Saveza. Ističe da je na ovoj sjednici prisutan načelnik Omerović u ime načelnika sa područja Tuzlanskog kantona kao pravi domaćin. Nakon pozdravnih riječi načelnika Imširovića, slijedi emitovanje filma o Općini Gradačac.

Nakon emitovanog filma o Općini Gradačac, g-din Alilović pozdravlja prisutne, te konstatuje da sjednici prisustvuje sedam članova Predsjedništva Saveza. Zahvaljuje načelniku Imširoviću na prezentaciji Općine Gradačac.

G-din Alilović konstatuje da su svi članovi dobili materijale, te predlaže Dnevni red kako slijedi:

1. Usvajanje Zapisnika i Zaključaka sa Šesnaeste sjednice Predsjedništva Skupštine Saveza općina i gradova Federacije Bosne i Hercegovine
2. Izvještaj sa zajedničke sjednice Komisije za ustavna i zakonodavna pitanja, Komisije za ekonomski razvoj općina i gradova i finansije, Komisije za razvoj i unapređenje lokalne

samouprave i Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša u vezi sa:

- a) Inicijative za izmjene i dopune Izbornog zakona Bosne i Hercegovine
- b) Nacrt zakona o električnoj energiji u Federaciji Bosne i Hercegovine
- c) Prednacrt zakona o turističkim zajednicama i promicanju turizma u Federaciji Bosne i Hercegovine
- d) Prednacrt zakona o poticanju razvoja male privrede u Federaciji Bosne i Hercegovine
- e) Inicijativa o donošenju zakona o proglašenju središta kantona/županija gradovima
- f) Zahtjev za zaštitu prava na lokalnu samoupravu Općine Travnik u vezi sa nedonošenjem Zakona o finansijskoj konsolidaciji javnih komunalnih preduzeća u Federaciji Bosne i Hercegovine
- g) Prijedlog zakona o lokalnoj samoupravi Kantona Sarajevo
- h) Nacrt zakona o javnom okupljanju Tuzlanskog kantona

### 3. Zakon o zaštiti i dobrobiti životinja

### 4. Izvještaj sa tematske sjednice na temu: „Raspodjela javnih prihoda u Federaciji Bosne i Hercegovine“

Izvjestilac: Hakija Osmić, načelnik Općine Zavidovići i član Radne grupe za analizu i pripremu rješenja u oblasti pripadnosti javnih prihoda u Federaciji Bosne i Hercegovine

### 5. Finansijski izvještaj o naplati članarina i preostalih dugovanja završno sa 08.12.2011. godine

### 6. Informacije:

- a) sa održane 8. Redovne sjednice Predstavničkog doma Parlamenta FBiH i 7. sjednice Doma naroda Parlamenta FBiH (Prijedlog zakona o izmjenama i dopunama Zakona o državnoj službi FBiH, Prijedlog zakona o matičnim knjigama, Nacrt zakona o šumarstvu)
- b) o održanoj raspravi o Zakonu o besplatnoj pravnoj pomoći
- c) o projektnim prijedlozima Saveza općina i gradova na IPA prekogranične programe: Hrvatska - Bosna i Hercegovina i Bosna i Hercegovina - Crna Gora
- d) o projektu „Jačanje kapaciteta entitetskih saveza općina i gradova u BiH“ - CDMA
- e) Beacon schema
- f) o održanom Okruglom stolu na temu: Saradnja Saveza općina i gradova FBiH i Parlamenta FBiH“
- g) o održanom seminaru na temu: „Primjena upravnog postupka“

### 7. Tekuća pitanja

- a) Informacija o formiranju Radne grupe za izmjene i dopune Zakona o principima lokalne samouprave u FBiH
- b) Zakon o izmjeni Zakona o parničnom postupku
- c) Zakon o zaposlenicima u organima jedinica lokalne samouprave
- d) Posjeta porodici Čenanović

G-din Alilović otvara diskusiju.

G-din Omerović ima primjedbu vezanu za predloženi Dnevni red. Ističe problem u vezi sa Zakonom o zaposlenicima u organima jedinica lokalne samouprave. Navodi da se Predsjedništvo Skupštine Saveza ovim pitanjem bavi još od 2005. godine, ali da do sada ništa nije riješeno. Smatra da, zbog važnosti, ovaj Zakon treba da bude prva tačka Dnevnog reda, a ne posljednja.

G-đa Travljanin informiše da se, kada je Zakon o zaposlenicima u organima jedinica lokalne samouprave u pitanju, radi o informaciji koju je Stručna služba Saveza dobila neposredno pred

održavanje današnje sjednice Predsjedništva Skupštine Saveza, te je zbog toga dodana u Dnevni red pod Tekuća pitanja.

G-din Hajder predlaže da se Dnevni red dopuni sa informacijom po Zaključku Kolegija općinskih načelnika Unsko-sanskog kantona, a u vezi sa Uredbom o građevinama i zahvatima od značaja za USK i građevinama, djelatnostima i zahvatima koji mogu u znatnoj mjeri uticati na okoliš, život i zdravlje ljudi.

G-din Alilović stavlja dopunjeni Dnevni red na glasanje sa prijedlogom g-dina Hajdera pod tačkom Tekuća pitanja.

### **Jednoglasno je usvojen dopunjeni Dnevni red.**

G-din Alilović prelazi na prvu tačku Dnevnog reda.

#### **1. Usvajanje Zapisnika i Zaključaka sa Šesnaeste sjednice Predsjedništva Skupštine Saveza općina i gradova Federacije Bosne i Hercegovine**

G-din Alilović otvara raspravu. Nakon konstatovanja da nema komentara, stavlja Zapisnik i zaključke na glasanje.

**Zapisnik i zaključci sa Šesnaeste sjednice Predsjedništva Skupštine Saveza općina i gradova Federacije Bosne i Hercegovine su jednoglasno usvojeni.**

#### **2. Izvještaj sa zajedničke sjednice Komisije za ustavna i zakonodavna pitanja, Komisije za ekonomski razvoj općina i gradova i finansije, Komisije za razvoj i unapređenje lokalne samouprave i Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša u vezi sa:**

##### **a) Inicijative za izmjene i dopune Izbornog zakona Bosne i Hercegovine**

G-đa Travljanin pozdravlja prisutne, te informiše da je današnja sjednica Predsjedništva Skupštine Saveza zadnja u ovoj godini. Obavještava o održanoj zajedničkoj sjednici skupštinskih komisija. Predlaže da Predsjedništvo Skupštine Saveza razmatra ovu tačku pojedinačno za svaki navedeni zakon.

Nakon što se Predsjedništvo Skupštine Saveza složilo sa prijedlogom g-đe Travljanin, g-đa Elvira Imširović-Bolić informiše o aktivnostima Saveza u vezi sa Izbornim zakonom Bosne i Hercegovine. Obrazlaže da je Inicijativu za izmjene i dopune Izbornog zakona Bosne i Hercegovine pokrenuo Savez opština i gradova Republike Srpske. Navodi da je ovu inicijativu razmatralo Predsjedništvo Skupštine Saveza općina i gradova Federacije BiH na Četrnaestoj sjednici održanoj 19.05.2011. godine u Bosanskom Petrovcu, te istu i podržalo. Inicijativa je išla u pravcu održavanja izbora istovremeno na svim nivoima. Naše Predsjedništvo je također usvojilo da se slijedeći izbori održe 2014. godine na svim nivoima. Inicijativa se trebala razmatrati na sastanku Koordinacionog tijela oba saveza, ali do održavanja ovog sastanka nije došlo, iako je naš Savez na tome u više navrata insistirao. S obzirom na činjenicu da je Parlamentarna skupština BiH imenovala radno tijelo koje će do kraja ove godine raditi i utvrditi prijedlog Zakona o izmjenama i dopunama Izbornog zakona BiH, predloženo je da Predsjedništvo Skupštine Saveza razmotri inicijative pristigle iz općina Busovača, Vareš i Bihać u vezi sa ovim zakonom, te da svoje stavove uputi prema Radnoj grupi Parlamentarne Skupštine BiH. Informiše da je rok za dostavljanje primjedbi i prijedloga u vezi sa ovim zakonom istekao 02.12.2011. godine. S tim u vezi prezentira prijedloge izmjena ovog zakona koji su pristigli u Savez.

G-din Živanović ističe da su izmjene Izbornog zakona Bosne i Hercegovine veoma ozbiljna stvar. Smatra da, ukoliko se Predsjedništvo Skupštine Saveza sa ovim primjedbama koje su do danas pristigle u Savez obrati prema Parlamentarnoj skupštini BiH, to nije način na koji bi se trebalo odnositi prema Izbornom zakonu. Navodi da će zbog toga biti suzdržan po svim prijedlozima. Smatra da svaka općina/grad treba dati svoje mišljenje o ovome, a ne samo članovi Predsjedništva Skupštine Saveza. S obzirom na činjenicu da se radi o ozbiljnim stvarima, izražava bojazan da se ne napravi potez koji jedinicama lokalne samouprave neće ići u korist. Predlaže ozbiljniji pristup po ovom pitanju, te u vezi s tim predlaže da se o ovom zakonu raspravlja narednih šest mjeseci i ukazuje na potrebu skretanja medijske pažnje.

G-din Hajder ističe da je član 28. Statuta Saveza jasan i da daje legitimitet članovima Predsjedništva Skupštine Saveza da predstavljaju sve jedinice lokalne samouprave. Osim toga, kao članovi Predsjedništva imaju dužnost da predstavljaju općine sa područja svog kantona. Slaže se da možda ne rade na najkvalitetniji način, ali misli da ne trebaju ustuknuti.

G-din Živanović podržava g-dina Hajdera, ali misli da neće biti shvaćeni ozbiljno. Ističe da trebaju čuvati svoj ugled. Misli da trebaju biti respektovani i poštovani, a ako se izađe sa ovim materijalom koji trenutno postoji, boji se da do toga neće doći.

G-din Alilović informiše da je ovaj zakon trebao biti razmatran na sastanku korodinacionog tijela oba saveza, ali da do tog sastanka nije došlo iako je on razgovarao sa g-dinom Davidovićem, predsjednikom Saveza opština i gradova Republike Srpske. Ističe da se u Bosni i Hercegovini izbori stalno održavaju, te da nema mogućnosti, niti smjelosti za neke ozbiljne inicijative i pokušaje da se promijeni stanje na lokalnoj i višim razinama. Navodi da ima informaciju da nije došlo do dogovora u ovoj Radnoj grupi, ali smatra da treba promijeniti stanje. Slaže se sa g-dinom Živanovićem da su nesporni u ovom trenutku.

G-din Jurić se slaže sa g-dinom Živanovićem, te ističe da u malim općinama nema kapaciteta da se previše bave ovim pitanjem. Konstatuje da u Savezu, na žalost, također nema kapaciteta, niti novaca za angažiranje eksperata u vezi sa ovim. Smatra da ovo što je sada na papiru je doseg Saveza u ovom trenutku. Misli da se općine mogu očitovati kada dobiju radni materijal koji pripremi Radna grupa.

G-đa Travljanin ističe da je na sastanku zajedničkih komisija Saveza rečeno da je ozbiljna stvar u pitanju, te da Predsjedništvo treba donijeti odluku.

G-din Omerović smatra da je ovo dobra inicijativa koja je pokrenuta od strane Saveza opština i gradova Republike Srpske. Ukazuje na činjenicu da će poslije Nove godine već krenuti kampanja za lokalne izbore. Konstatuje da je problem što općine snose sve troškove. Navodi da, kada predstavnici iz općina budu izabrani na više nivoa vlasti, zaborave općine. Smatra da bi bilo dobro da se dobije materijal od Interresorne radne grupe koja radi na pripremi izmjena i dopuna Izbornog zakona. Što se tiče prijedloga da kandidati za načelnika općine mogu biti i na listama za Općinsko vijeće, smatra da se načelnici trebaju opredijeliti gdje će. Što se tiče prijedloga da općinskog načelnika, u slučaju spriječenosti da svoju dužnost obavlja iz bilo kog razloga, mijenja jedan od pomoćnika, ističe da je to već riješeno i da postoji zakonska mogućnost. Što se tiče prijedloga teritorijalne zastupljenosti u kantonalnim skupštinama i Parlamentu Federacije BiH, smatra da ovo stranke trebaju uraditi na osnovu zatvorenih lista. Navodi da u Tuzlanskom kantonu, od ukupno 13 općina, samo tri imaju predstavnike na višim nivoima vlasti. Misli da otvorene liste nisu dobre jer dovode do sukoba unutar političkih partija. Predlaže da se sačeka radni materijal zakona, jer je državni nivo u problemima. Smatra da se Savez treba očitovati kada dobije radni materijal Zakona. Što se tiče prijedloga da se odredbe Izbornog zakona BiH i Zakona o izboru, prestanku mandata, opozivu i zamjeni načelnika općina u Federaciji Bosne i Hercegovine koje se odnose na izbor, prestanak mandata, opoziv, zamjenu općinskog načelnika i druga pitanja, direktno primjenjuju i na gradonačelnike gradova sjedišta kantona, misli da se treba iznaći modus da se riješi pitanje gradonačelnika, jer ni

Sarajevo i Mostar nisu riješeni na isti način. Predlaže da se pribavi materijal Radne grupe, pa se onda očitovati o njemu.

G-din Alilović je u dilemi da li Savez treba nastupiti samostalno ili zajedno sa Savezom opština i gradova Republike Srpske.

G-din Živanović informiše da je bio prisutan kada se sastala Interresorna radna grupa, te da misli da će se samo razmatrati problem Sejdić - Finci i ništa više. Predlaže da se o ovoj tačci razmatra kao o nekoj informaciji, te da se napravi projektni zadatak na kome će Savez raditi. Kao potencijalnog donatora za ovaj projekat navodi Švajcarce sa kojima je Savez radio na projektu ustavnih promjena. Predlaže da Savez informiše Parlamentarnu skupštinu BiH da su u okviru Saveza vođeni razgovori o ovome, te da ćemo pratiti proces i uključiti se u isti.

G-din Alilović dodaje da se treba navesti da Savez daje podršku ovoj Interresornoj radnoj grupi, te da ćemo se uključiti.

G-din Hajder traži informaciju vezano za sastanak Koordinacionog tijela oba saveza.

G-đa Travljanin informiše da nije došlo do sastanka. Navodi da je Savez sa Švicarskom već radio na projektu izmjene ustava.

G-din Živanović smatra da se trebaju sve jedinice lokalne samouprave uključiti u ovo.

G-din Dedić predlaže da se ovaj zaključak uputi svim općinama kako bi bile informisane o ovome.

G-din Hajder smatra da treba održati vezu sa Savezom opština i gradova Republike Srpske zbog zajedničke snage.

G-din Alilović stavlja na glasanje prijedloge iznesene u raspravi.

**Jednoglasno je usvojeno da se uputi dopis Parlamentarnoj skupštini Bosne i Hercegovine s ciljem informisanja da su u okviru Saveza općina i gradova Federacije BiH vođeni razgovori o izmjenama i dopunama Izbornog zakona BiH, sa zamolbom za dostavljanje radnog materijala izmjena i dopuna Izbornog zakona BiH koji pripremi Inreresorna radna grupa, kako bi se Savez mogao očitovati o istom. S obzirom na ozbiljnost materije koju tretira Izborni zakon BiH i neophodnost vođenja šire javne rasprave, usvojeno je da Savez pripremi projektni zadatak u vezi sa izmjenom i dopunom Izbornog zakona BiH koji bi se uputio donatorima na odobravanje.**

## **b) Nacrt zakona o električnoj energiji u Federaciji Bosne i Hercegovine**

G-đa Zlata Turkić informiše da su o Nacrtu zakona o električnoj energiji u Federaciji Bosne i Hercegovine primjedbe dostavile općine Jablanica i Ključ. U raspravi na zajedničkoj sjednici komisija o ovom nacrtu ukazano je na nedostatke vezane za proizvodnju iz obnovljivih izvora energije (član 43. stav 2.) u kome se pitanja iz oblasti proizvodnje električne energije iz obnovljivih izvora energije i kogeneracije, koja nisu regulisana ovim zakonom, regulišu posebnim propisom. Navodi da je istaknuta potreba da se u članu 73. stav 3. treba dodati tekst „uz određenu nadoknadu vlasniku zemljišta“. Takođe, u istom članu treba dodati stav 4. u kome se precizira da se nadoknada iz prethodnog stava odnosi i na stare i na postavljanje novih elektroinstalacija.

G-din Jurić ističe problem u vezi sa dvostranim napajanjem. Navodi problem neplaćanja od strane onih subjekata koji imaju jako puno sredstava. Korisnici su zajedničke komunalne potrošnje, ali neće da plate komunalne naknade koje se obračunavaju. Dilema je, da li u ovaj zakon ugraditi odredbu koja će definirati, odnosno riješiti ovaj problem.

G-din Hajder smatra da je to već u nekom zakonu definirano.

G-din Jurić predlaže, ukoliko postoji mogućnost, da se ugradi odredba kako bi se ovaj problem riješio.

G-din Omerović navodi da je kantonalnim zakonom ovo regulisano.

G-đa Turkić informiše da je 22.12.2011. godine u Tuzli planirana javna rasprava o Nacrtu zakona o električnoj energiji u Federaciji Bosne i Hercegovine.

G-din Hajder smatra da se može pojaviti problem ako se takva odredba stavi u ovaj zakon, a kantonalni zakon to nije odredio. Ističe da je u Unsko-sanskom kantonu to jako dobro regulisano, te se g-dinu Juriću stavlja na raspolaganje u vezi sa ovim.

G-din Dedić navodi da, po Zakonu o komunalnim djelatnostima, javna preduzeća plaćaju sve Općini Jablanica. Smatra da su zaključci sa sastanka zajedničke komisije Saveza jako dobri, te predlaže da se isti podrže. Ističe da se sa g-dinom Jurićem treba vidjeti za rješenje njegovog problema.

G-din Alilović ističe da ni kod njih ovo nije riješeno.

G-din Dedić predlaže da se podrže zaključci sa sastanka zajedničke komisije Saveza, te da svi prisustvuju javnoj raspravi o ovom zakonu. Navodi primjer tužbe premijera Nikšića prema Općini Konjic, te informiše da je Ustavni sud Federacije BiH potvrdio odluke jedinica lokalne samouprave 13.12.2011. godine.

G-đa Kovačević informiše da se u Federalnom ministarstvu finansija radi sistematizacija zakona koji su vezani za komunalne naknade, jer je ovo pitanje različito riješeno od kantona do kantona.

G-din Jurić navodi primjer izgradnje koridora, te informiše koliko sredstava dobiva kanton. Ističe da općina ne dobiva ništa.

G-din Omerović informiše o zakonu o poljoprivrednom zemljištu.

G-din Alilović stavlja na glasanje zaključke sa zajedničke sjednice komisija Saveza, održane 15.12.2011. godine, u vezi sa ovom tačkom, te predlaže da se svi pojave na javnoj raspravi.

**Jednoglasno je usvojeno da se daje podrška Nacrtu zakona o električnoj energiji u Federaciji Bosne i Hercegovine kao osnovi za izradu Prijedloga u koji će biti ugrađene dostavljene primjedbe, kao i primjedbe iznesene na sjednici, sa prijedlogom da članovi Predsjedništva Skupštine Saveza prisustvuju javnim raspravama koje budu organizirane u vezi sa ovim zakonom.**

### **c) Prednacrt zakona o turističkim zajednicama i promicanju turizma u Federaciji Bosne i Hercegovine**

G-đa Travljanin predlaže da se u daljem toku sjednice razmatraju samo zaključci sa zajedničke sjednice komisija Saveza. Nakon što su se svi složili, informiše o zaključcima u vezi sa ovom tačkom.

G-din Omerović smatra da je najbolje da u izradu ovog zakona budu uključeni predstavnici jedinica lokalne samouprave koji imaju najveći interes, te će na taj način sve ostale profitirati.

G-din Jurić ističe da formiranje turističkih zajednica po općinama nije dobro rješenje za njihov kanton, jer im je dovoljna jedna.

G-din Živanović izražava podršku Prednacrtu zakona jer je jako bitan za mnoge jedinice lokalne samouprave. Ističe da ovaj prednacrt daje mogućnost da se svi organizuju kako hoće. Stavlja se na raspolaganje Savezu za organiziranje još jedne javne rasprave o ovom zakonu, kako bi se došlo do još kvalitetnijih rješenja. Smatra da je jako bitno da Savez ovdje bude aktivan.

G-din Hajder informiše o zaključku sa Kolegija općinskih načelnika Unsko-sanskog kantona. Navodi da se zalažu za razvoj lokalnog turizma, te ističe da se slaže sa g-dinom Živanovićem.

G-din Alilović stavlja na glasanje zaključke sa zajedničke sjednice komisija Saveza, održane 15.12.2011. godine, u vezi sa ovom tačkom.

**Jednoglasno je usvojeno da se prihvata Prednacrt zakona o turističkim zajednicama i promicanju turizma u Federaciji Bosne i Hercegovine, sa preporukom da se u Nacrt zakona uključe primjedbe dostavljene iz jedinica lokalne samouprave.**



**d) Prednacrt zakona o poticanju razvoja male privrede u Federaciji Bosne i Hercegovine**

G-đa Turkić informiše da su primjedbe na Prednacrt zakona o poticanju razvoja male privrede u Federaciji Bosne i Hercegovine dostavile općine Odžak, Tuzla, Jablanica, Kakanj i Tešanj.

G-din Alilović stavlja na glasanje zaključke sa zajedničke sjednice komisija Saveza, održane 15.12.2011. godine, u vezi sa ovom tačkom.

**Jednoglasno je usvojeno da se prihvata Prednacrt zakona o poticanju razvoja male privrede u Federaciji Bosne i Hercegovine sa preporukom da se u Nacrt zakona uključe primjedbe dostavljene iz jedinica lokalne samouprave.**

**e) Inicijativa o donošenju zakona o proglašenju središta kantona/županija gradovima**

G-đa Imširović-Bolić obrazlaže da je Inicijativu o donošenju zakona o proglašenju središta kantona/županija gradovima pokrenuo g-din Predrag Kožul, poslanik u Predstavničkom domu Parlamenta Federacije BiH. Savez je prikupio očitovanja općina Goražde, Zenica, Tuzla, Bihać, Orašje i Široki Brijeg u vezi sa ovom inicijativom. Navodi da je Inicijativa razmatrana na sjednici Komisije za lokalnu samoupravu Predstavničkog doma Parlamenta Federacije BiH 22.11.2011. godine, te je zaključeno da se ista, zajedno sa očitovanjem općina pristiglim u Savez, dostavi Federalnom ministarstvu pravde na dalje postupanje. Federalno ministarstvo pravde je dostavilo Obavijest u vezi sa Inicijativom o donošenju zakona o proglašenju središta kantona/županija gradovima u kojoj se, između ostalog, navodi da je pitanje grada nedovoljno razrađeno u pravnom sistemu Federacije BiH, te je potrebno provesti širu raspravu u kojoj bi bili angažovani svi zainteresovani za rješavanje ovog pitanja. Navodi da su i ranije postojali slučajevi kada su pojedine općine pokušale da se proglase gradovima, ali da su se ti zakoni povukli iz procedure. Jedan od razloga za povlačenje je bio i taj da se u Zakonu o uspostavljanju grada našla i odredba po kojoj gradonačelnika bira gradsko vijeće, a ne direktno građani.

G-đa Travljanin smatra da treba ići prema donatoru sa svim ovim problemima.

G-din Živanović smatra da je neozbiljna inicijativa ovog poslanika u smislu da je jako štura, te da je bilo neophodno istu pripremiti na većem broju strana, a ne na jednoj kako je to učinjeno.

G-din Alilović stavlja na glasanje zaključak sa zajedničke sjednice komisija Saveza, održane 15.12.2011. godine, u vezi sa ovom tačkom.

**Jednoglasno je usvojeno da se ovo pitanje treba razriješiti kroz zakonsku regulativu.**

**f) Zahtjev za zaštitu prava na lokalnu samoupravu Općine Travnik u vezi sa nedonošenjem Zakona o finansijskoj konsolidaciji javnih komunalnih preduzeća u Federaciji Bosne i Hercegovine**

G-đa Turkić informiše o Zahtjevu za zaštitu prava na lokalnu samoupravu Općine Travnik u vezi sa nedonošenjem Zakona o finansijskoj konsolidaciji javnih komunalnih preduzeća u Federaciji Bosne i Hercegovine. Navodi da se o istom već ranije raspravljalo na sjednici Predsjedništva Skupštine Saveza, te je donesen zaključak da se anketiraju jedinice lokalne samouprave, s ciljem ispitivanja stanja u ovoj oblasti. O ovome su se očitovale općine Bosanska Krupa, Ključ, Vareš, Busovača i Jablanica. Napominje da je 13.12.2011.godine Ustavni sud Federacije Bosne i Hercegovine o ovome imao raspravu.

**Jednoglasno je usvojeno da se treba sačekati donošenje presude od strane Ustavnog suda Federacije Bosne i Hercegovine.**

**g) Prijedlog zakona o lokalnoj samoupravi Kantona Sarajevo**

G-đa Imširović-Bolić obrazlaže da se o ovom zakonu raspravlja već nekoliko godina. Ističe da će spomenuti samo posljednje aktivnosti u vezi sa istim. Navodi da je Ministarstvo pravde i uprave Kantona Sarajevo 18.10.2011. godine organiziralo Okrugli sto u vezi sa radnim materijalom Prijedloga zakona o lokalnoj samoupravi. Okruglom stolu su, pored predstavnika kantonalnih ministarstava, prisustvovali predstavnici svih jedinica lokalne samouprave sa područja Kantona Sarajevo, kao i predstavnici Saveza. Tada je Savezu ostavljen rok da se do kraja mjeseca očituje o tekstu Prijedloga zakona. Međutim, Prijedlog zakona je dostavljen u petak, a ponedjeljak je bio posljednji dan mjeseca oktobra. Zbog hitnosti, Savez je organizirao sastanak sa predstavnicima jedinica lokalne samouprave sa područja Kantona Sarajevo 03.11.2011. godine. Na tom sastanku su jednoglasno usvojeni Stavovi u vezi sa Prijedlogom zakona o lokalnoj samoupravi, te su isti dostavljeni Skupštini Kantona Sarajevo, Vladi Kantona Sarajevo, te resornom ministarstvu, uz obavezu informisanja nadležne skupštinske komisije Saveza i Predsjedništva Skupštine Saveza. Od nekoliko Općinskih vijeća Savez je dobio povratnu informaciju da su Stavovi razmatrani na njihovim sjednicama, te da su podržani.

G-din Živanović informiše da se ništa nije desilo sa ovim zakonom, da nema nikakvog pomjeranja naprijed. Predlaže da se podrže Stavovi Saveza.

G-din Alilović stavlja na glasanje zaključak sa zajedničke sjednice komisija Saveza, održane 15.12.2011. godine, u vezi sa ovom tačkom.

**Jednoglasno su usvojeni Stavovi sa sastanka u vezi sa Prijedlogom zakona o lokalnoj samoupravi.**

#### **h) Nacrt zakona o javnom okupljanju Tuzlanskog kantona**

G-din Omerović informiše da je obavljena javna rasprava o Nacrtu zakona o javnom okupljanju Tuzlanskog kantona, te predlaže da se ovaj zakon podrži.

G-din Alilović stavlja na glasanje zaključak sa zajedničke sjednice komisija Saveza, održane 15.12.2011. godine, u vezi sa ovom tačkom

**Jednoglasno je usvojeno da se prihvata Nacrt zakona o javnom okupljanju Tuzlanskog kantona.**

G-đa Turkić informiše da je na zajedničkoj sjednici komisija Saveza predloženo da Predsjedništvo Skupštine Saveza zbog hitnosti djelovanja razmotri dvije inicijative iz oblasti pravobranilaštva koje su pristigle u Savez. Prva inicijativa je akt Općine Bužim u vezi sa problemom izbora i imenovanja općinskog pravobranioca i njihovo obraćanje Kantonalnom ministarstvu pravde i uprave (Unsko-sanski kanton), a druga inicijativa je pristigla iz Udruženja pravobranilaca u Federaciji BiH, a odnosi se na Inicijativu za izmjenu odredbe člana 138. Zakona o izmjenama i dopunama Zakona o izvršnom postupku Federacije BiH.

G-din Hajder informiše o **problemu Općine Bužim u vezi sa izborom pravobranioca u toj općini**. Navodi proceduru izbora, te informiše da Općinsko vijeće nije izabralo pravobranioca i nije dalo nikakvo obrazloženje.

G-din Omerović smatra da treba ponoviti konkurs.

G-đa Godžirov-Savičić se obraća skupu. Navodi da je predsjednica Udruženja pravobranilaca u Federaciji Bosne i Hercegovine, te informiše da je Udruženje pripremlilo projekat reforme pravobranilačke funkcije. Ističe da je različito riješeno pitanje pravobranilaca od kantona do kantona. Navodi da općinsko vijeće bira pravobranioca, a da kao kolegijalni organ ne snosi odgovornost. U Zakonu o pravobranilaštvu propisano je da općine moraju imati pravobranilaštvo. To je obaveza jedinica lokalne samouprave. Predlaže da se aktom Udruženje pravobranilaca obrati načelniku Općine Bužim u vezi sa ovim, da se pozovu na



diskriminaciju, na određene norme i principe, te da pronađe modus da se odgovornost vijeća podvede pod neku normu. Treba im ukazati i na probleme koji mogu nastati po budžet Općine. Ponovno ističe problem što vijećnici ne snose nikakvu odgovornost.

G-din Dedić ističe da su imali isti problem u Općini Jablanica. Navodi da je izabran pravobranilac, ali da nije dobar advokat Općine jer gubi sve sporove. Ističe da Općinsko vijeće treba da razriješiti pravobranioca, jer neće usvojiti njegov Izvještaj o radu pravobranilaštva.

G-đa Godžirov-Savičić ukazuje upravo na pitanje potrebe reforme pravobranilaštva. Navodi da pregovaraju da se uradi jedan zakon, kako bi se jedinstvenim zakonom na nivou cijele Federacije BiH riješilo ovo pitanje.

G-din Živanović ukazuje na federalni zakon i nadzor od strane ministarstva pravde, te analognu primjenu odredbe Zakona o principima za zaštitu općinske imovine i usvajanja budžeta.

G-đa Travljanin ukazuje na problem neodgovornosti Općinskog vijeća.

G-din Omerović spominje Zakon o izboru, prestanku mandata, opozivu i zamjeni načelnika općina u Federaciji Bosne i Hercegovine i neodgovornost vijećnika.

**Jednoglasno je usvojen zaključak da se Općina Bužim pismenim putem za mišljenje obrati Udruženju pravobranilaca u Federaciji Bosne i Hercegovine.**

Prije nego što se razmotri inicijativa koja je pristigla iz Udruženja pravobranilaca u Federaciji BiH, odlučeno je da se razmotri tačka 7. b) u vezi sa **Zakonom o izmjeni Zakona o parničnom postupku**. G-đa Imširović-Bolić informiše da je inicijativu za izmjenu ovog zakona svojevremeno pokrenulo Udruženje pravobranilaca u Federaciji BiH. Inicijativa je išla u pravcu dovođenja u ravnopravan položaj stranaka u postupku, odnosno pravobranilaca sa advokatima. Naime, prema sadašnjim odredbama zakona, pravobranioci, kao zakonski zastupnici Federacije, kantona i općina imaju pravo samo na naknadu, a ne i na nagradu za radnje poduzete u zastupanju, a na koju pravo ostavaruju advokati. Nakon neuspjelog pokušaja za realizaciju ove Inicijative, Udruženje pravobranilaca u Federaciji BiH se obratilo Savezu za podršku iste. Nakon što je Predsjedništvo Skupštine Saveza podržalo ovu inicijativu na sjednici održanoj ove godine u Hadžićima, Savez se obratio Federalnom ministarstvu pravde sa zahtjevom za stavljanje ovog zakona u proceduru. Vlada FBiH je udovoljila našem zahtjevu, te će se o Prijedlogu zakona o izmjeni Zakona o parničnom postupku (skraćeni postupak) razmatrati 28.12.2011. godine na sjednici Predstavničkog doma Parlamenta Federacije BiH.

**Informacija je primljena k znanju.**

G-đa Godžirov-Savičić informiše o inicijativi Udruženja pravobranilaca u Federaciji BiH koja je vezana za izmjenu odredbe člana 138. **Zakona o izmjenama i dopunama Zakona o izvršnom postupku Federacije BiH**. Navodi da trenutno prema članu 138. općine u svojim budžetima planiraju stavku vezanu za izvršenje sudskih presuda. Dalje navodi da se izvršenje sprovodi po redosljedu namirenja. Ističe da su različita mišljenja po ovom pitanju, te da jedni podržavaju ovo rješenje, a drugi ne. Prema izmjeni ovog zakona iz 2006. godine, u budžetu općine se mora se obezbijediti 5% za izvršenje sudskih presuda. Ističe da ovu odredbu advokati debelo koriste. Smatra da se za izvršenje sudskih presuda može skinuti samo iznos koji je planiran u budžetu. Navodi da je prije nekoliko dana donesena presuda u vezi sa ustavnošću ove odredbe. Pravobranioci smatraju da bi se napravila diskriminacija, ukoliko bi se ovih 5% primjenjivalo na sve nivoe vlasti, iz dva razloga: 1. nemaju sve općine iste budžete, 2. općine su najviše izložene sudskim sporovima. Zbog navedenog predlažu da izmjena treba da ide u smislu uspostavljanja platnih razreda prema godišnjim budžetima.

G-đa Imširović-Bolić informiše o izmjenama ovog zakona koje su razmatrane na sjednici Doma naroda Parlamenta Federacije BiH održanoj 8.12.2011. godine. Obavještava da se danas održava nastavak te sjednice, te će se danas glasati o predloženim izmjenama.

G-din Živanović podržava prijedlog da se uvrste platni razredi, te predlaže da se prije procenta doda riječ „do“.

G-din Osmić smatra da se treba sačekati rezultat današnjeg glasanja na sjednici Doma naroda. Interesuje ga da li se uzimaju namjenska sredstva ili cijeli budžet.

G-đa Godžirov-Savičić predlaže da nadležna komisija Udruženja pravobranilaca u Federaciji BiH i nadležna komisija saveza razmotre ovo pitanje i utvrde konačan prijedlog, odnosno, da se utvrde platni razredi i doda riječ „do“.

G-din Alilović stavlja na glasanje prijedlog da Komisija za ustavna i zakonodavna pitanja i Komisija za ekonomski razvoj općina i gradova i finansije zajedno sa nadležnom komisijom Udruženja pravobranilaca u Federaciji BiH razmotre i utvrde prijedlog izmjene odredbe člana 138. Zakona o izmjenama i dopunama Zakona o izvršnom postupku Federacije BiH.

G-đa Travljanin predlaže da se zaduži Stručna služba Saveza da u saradnji sa Udruženjem pravobranilaca u Federaciji BiH organizira sastanak nadležnih komisija s ciljem utvrđivanja prijedloga ove izmjene.

G-din Osmić predlaže preporuku komisijama Saveza da se izuzmu namjenska sredstva općina, odnosno da se ne razmatra o cijelom budžetu općina.

**Jednoglasno je usvojeno da Komisija za ustavna i zakonodavna pitanja i Komisija za ekonomski razvoj općina i gradova i finansije zajedno sa nadležnom komisijom Udruženja pravobranilaca u Federaciji BiH razmotre i utvrde prijedlog izmjene odredbe člana 138. Zakona o izmjenama i dopunama Zakona o izvršnom postupku Federacije BiH, sa preporukom da se izuzmu namjenska sredstva općina, odnosno da se ne razmatra o cijelom budžetu općina.**

### 3. Zakon o zaštiti i dobrobiti životinja

G-đa Turkić informiše o aktivnostima Saveza u vezi sa Zakonom o zaštiti i dobrobiti životinja. Navodi da se o ovom zakonu trebalo razmatrati na sastanku Koordinacionog tijela oba saveza do kojeg na žalost nikada nije došlo. Ističe da se udruženja za zaštitu životinja stalno pozivaju na član 8. Zakona o principima lokalne samouprave u Federaciji BiH, po kome je zaštita životinja u nadležnosti jedinica lokalne samouprave. U vezi sa ovim, ukazuje na potrebu primjene Zakona o principima lokalne samouprave u Federaciji BiH, u smislu potrebe prijenosa sredstava za ovu nadležnost jedinica lokalne samouprave.

**Jednoglasno je usvojeno da Savez pristigle primjedbe na Zakon o zaštiti i dobrobiti životinja uputi prema nadležnom ministarstvu, ukoliko u međuvremenu ne bude organizovan sastanak Koordinacionog tijela oba saveza.**

### 4. Izvještaj sa tematske sjednice na temu: „Raspodjela javnih prihoda u Federaciji Bosne i Hercegovine“

G-din Osmić podsjeća da je zajedno sa g-dinom Dedovićem ispred Saveza imenovan za člana Radne grupe za analizu i pripremu rješenja u oblasti pripadnosti javnih prihoda u Federaciji Bosne i Hercegovine, a koju je imenovala Vlada Federacije BiH. Informiše da je 15.12.2011. godine Savez organizirao tematsku sjednicu za pomoćnike općinskih načelnika za finansije na temu: „Raspodjela javnih prihoda u Federaciji Bosne i Hercegovine“, te da su materijal za ovu tačku svi dobili u pisanoj formi. Dalje informiše o prijedlozima sa tematske sjednice. Ukazuje na problem otplate vanjskog duga koji se oduzme prije nego što se izvrši raspodjela sredstava jedinicama lokalne samouprave od indirektnih poreza sa Jedinostvenog računa. Informiše prisutne

da je jučer održan prvi sastanak Radne grupe za analizu i pripremu rješenja u oblasti pripadnosti javnih prihoda u Federaciji Bosne i Hercegovine, te da su ukazani pravci u kojima treba ići. Obrazlaže da ovu radnu grupu čine predstavnici oba doma Parlamenta Federacije BiH, predstavnici kantona, predstavnici Saveza i GAP-a. Informiše o kriterijama za raspodjelu sredstava od PDV-a i posljedicama po općine. Jedan od zaključaka sa sastanka je bio da će Savez dobiti model raspodjele javnih prihoda u elektronskoj formi koji će poslužiti za simulaciju raspodjele javnih prihoda u slučajevima promjene kriterija raspodjele, odnosno kao simulator koji će općinama dati mogućnost da ukucaju i promjene kriterije, te automatski vide koje su posljedice za njih. Navodi da je ovo bio prvi sastanak, te da je planirano da se do 30.06.2012. mora pronaći rješenje. Ističe da je na sastanku stekao dojam da su parlamentarci za dodjelu više sredstava za jedinice lokalne samouprave.

G-dina Jurića zanima pitanje podataka vezanih za statistiku.

G-din Osmić navodi da se i to pitanje otvorilo na jučerašnjem sastanku, te da je relevantnije pitanje broja učenika.

G-din Omerović obrazlaže kako ti podaci nisu relevantni, te ukazuje na situacije u općinama Gradačac i Kalesija kod kojih je 1/3 teritorija u Republici Srpskoj.

G-din Živanović predlaže da Savez uputi akt prema stranim organizacijama da podrže rad ove radne grupe.

G-đa Travljanin ukazuje na značaj izrade novog zakona, te na činjenicu da Savez ima dva predstavnika u ovoj radnoj grupi. Smatra da je sada momenat da se lokalne zajednice izbore za svoj status. Moli g-đu Kovačević da izvijesti o informacijama koje posjeduje samo Savez, a vezane su za stanje otplate vanjskog duga.

G-đa Kovačević informiše da će se rad Radne grupe odvijati po tematskim sjednicama. Tema slijedeće sjednice su indirektni porezi. Navodi da će članovi Radne grupe dobiti model prije sjednice, te da će Savez isti proslijediti svim općinama. Nakon prikupljanja primjedbi od strane naših članica, Savez će ponovno organizirati tematsku sjednicu. Ističe da po ovom pitanju Savez ima malu tehničku pomoć od strane GAP-a. Dalje navodi da je na sjednici Predsjedništva održanoj u Hadžićima donesena odluka da Savez pripremi analizu stand by aranžmana. Informiše da je Stručna služba Saveza to uradila. Navodi da je to bio ogroman i jako težak posao, posebno vezano za dostupnost podataka. Ukazuje na stanje vanjskog duga i način njegove otplate.

G-din Jurić ističe da, od kada je član Predsjedništva Skupštine Saveza, nije dobio bolji materijal od ovoga koji je podijeljen u vezi sa ovom tačkom.

G-đa Kovačević navodi da je druga tematska sjednica vezana za direktne poreze, a treća za neporezne prihode.

G-din Jurić ističe primjer Grada Rijeka koja ima najbolju moguću naplatu jer to rade preko agencije koja uzima procenat.

**Jednoglasno je usvojen Izvještaj sa tematske sjednice na temu: „Raspodjela javnih prihoda u Federaciji Bosne i Hercegovine“.**

## **5. Finansijski izvještaj o naplati članarina i preostalih dugovanja završno sa 08.12.2011. godine**

G-din Alilović navodi da su sve članice Saveza dobile pregled naplate članarina.

G-đa Travljanin informiše da je pregled naplate članarina pripremljen shodno Strategiji razvoja Saveza, a u skladu sa strateškim ciljem 4. „Otvorenost i finansijska održivost Saveza“. Navodi da Savezu članice duguju 250.000 KM. Ističe da iznos članarina nije mijenjan 4 godine. Smatra da nema pravo da krije one članice koje ne plaćaju članarinu.

G-din Hajder navodi da su općinski načelnici Unsko-sanskog kantona ovo pitanje razmatrali na Kolegiju. Navodi da je uputio kritike načelniku Općine Sanski Most, te navodi da je on skoro izabran na funkciju načelnika. Smatra da svaki član Predsjedništva treba preuzeti obavezu

izmiranja članarina za općine sa područja svog kantona, u smislu animiranja načelnika za ispunjenje ove obaveze.

G-din Jurić navodi da zna da se treba članarina plaćati, ali ističe da ima problem naplate komunalnih naknada. Traži potporu za svoju odluku kroz Savez iz razloga što Savez komunicira sa svima. Smatra da Savez mora stvarati nove ideje, te da je to prilika Savezu za povećanje prihoda.

G-din Alilović stavlja na glasanje prijedlog da članovi Predsjedništva Skupštine Saveza preuzmu odgovornost i obavezu da kontaktiraju načelnike sa područja svog kantona kako bi izvršili svoje obaveze vezane za uplate članarina Savezu.

**Jednoglasno je usvojeno da članovi Predsjedništva Skupštine Saveza preuzmu odgovornost i obavezu da kontaktiraju načelnike sa područja svog kantona kako bi izvršili svoje obaveze vezane za uplate članarina Savezu.**

## 6. Informacije:

### a) sa održane 8. Redovne sjednice Predstavničkog doma Parlamenta FBiH i 7. sjednice Doma naroda Parlamenta FBiH (Prijedlog zakona o izmjenama i dopunama Zakona o državnoj službi FBiH, Prijedlog zakona o matičnim knjigama, Nacrt zakona o šumarstvu)

G-đa Imširović-Bolić informiše da je Predstavnički dom Parlamenta Federacije Bosne i Hercegovine 23. i 24.11.2011. godine održao 8. Redovnu sjednicu, a Dom naroda Parlamenta FBiH je svoju 7. sjednicu održao 08.12.2011. godine. Na ovim sjednicama razmatrani su Prijedlog zakona o izmjenama i dopunama Zakona o državnoj službi FBiH, Prijedlog zakona o matičnim knjigama i Nacrt zakona o šumarstvu. Na Predstavničkom domu su usvojeni svi navedeni zakoni. Dom naroda ih je razmatrao, ali je glasanje odgođeno za nastavak sjednice koja se održava danas, s tim da je za Nacrt zakona o šumarstvu zaključeno da se kantoni u roku od 15 dana očituju.

G-din Hajder informiše da je u svojoj Općini organizirao javnu raspravu o Nacrtu zakona o šumarstvu. Traži od Saveza da prihvati dvije primjedbe sa rasprave, te da se iste razmatraju na nadležnim komisijama Saveza.

G-dina Jurića zanima hoće li se novac direktno uplaćivati općinama.

G-din Hajder potvrđuje da novac ide direktno.

G-din Omerović smatra da ovaj zakon neće proći na Domu naroda Parlamenta FBiH. Ističe da su svi poslovi preneseni na Federalnu upravu, te da tu pojedinci vide sebe i vlastite interese. Navodi da je on tvorac Zakona o šumama koji je do sada bio na snazi, jer je u vrijeme njegovog usvajanja bio predsjednik Komisije za poljoprivredu, vodoprivredu i šumarstvo u Parlamentu FBiH. Smatra da neće biti donesen, iako misli da je najgora opcija da ga nema. Dalje ističe da, ako se danas usvoji Prijedlog zakona o izmjenama i dopunama Zakona o državnoj službi FBiH, opet općine nemaju zakona. Predlaže da Savez pošalje upit prema oba doma Parlamenta Federacije BiH s ciljem dobivanja odgovora na pitanje kakav je status jedinica lokalne samouprave, odnosno kako da iste postupaju u novonastaloj situaciji s obzirom na činjenicu postojanja pravne praznine u ovoj oblasti.

G-din Alilović stavlja na glasanje prijedlog g-dina Omerovića.

**Jednoglasno je usvojeno da Savez pošalje upit prema oba doma Parlamenta Federacije BiH s ciljem dobivanja odgovora na pitanje kakav je status jedinica lokalne samouprave, odnosno kako da iste postupaju u novonastaloj situaciji s obzirom na činjenicu postojanja pravne praznine u ovoj oblasti. Također je usvojeno da se odgovor uputi prema svim općinama.**

**b) o održanoj raspravi o Zakonu o besplatnoj pravnoj pomoći**

G-đa Imširović-Bolić informiše da je Savez pozvan, te da su njegovi predstavnici prisustvovali javnoj raspravi o Zakonu o besplatnoj pravnoj pomoći. Napominje da se ovaj zakon odnosi samo na državni nivo, te da uopće ne tretira lokalni. Navodi da je ovakav zakon već usvojen u četiri kantona u Federaciji BiH, u Republici Srpskoj i Brčko Distriktu.  
**Informacija je primljena k znanju.**

**c) o projektnim prijedlozima Saveza općina i gradova na IPA prekogranične programe: Hrvatska - Bosna i Hercegovina i Bosna i Hercegovina - Crna Gora**

G-đa Travljanin informiše da je Savez puno radio na pripremi, te da je aplicirao sa dva projekta na IPA prekogranične programe. Sa Crnom Gorom Savez je aplicirao na temu turizma, a sa Hrvatskom na temu prevencije od prirodnih katastrofa i zaštite okoliša. Dalje navodi koje su jedinice lokalne samouprave uključene u ove projekte. Kada Savez dobije informacije u vezi sa odabirom, izvijestit će Predsjedništvo Skupštine Saveza.

G-dina Omerovića zanima zašto Savez nije aplicirao sa Srbijom.

G-đa Travljanin informiše da Savez nije imao kapaciteta za pripremu projekta.

**Informacija je primljena k znanju.**

**d) o projektu „Jačanje kapaciteta entitetskih saveza općina i gradova u BiH“ – CDMA**

G-đa Travljanin informiše o aktivnostima koje su u međuvremenu provedene u okviru projekta „Jačanje kapaciteta entitetskih saveza općina i gradova u BiH“ – CDMA.

**Informacija je primljena k znanju.**

**e) Beacon schema**

G-đa Travljanin informiše o projektu Beacon schema, te o temama koje su izabrane za ovaj krug. Ističe da je dodjela Beacon statusa prolongirana za januar. Informiše da je Savjetodavna komisija uputila prijedlog za dodjelu nagrada.

**Informacija je primljena k znanju.**

**f) o održanom Okruglom stolu na temu: „Saradnja Saveza općina i gradova FBiH i Parlamenta FBiH“**

G-đa Travljanin informiše o održanom Okruglom stolu na temu: „Saradnja Saveza općina i gradova FBiH i Parlamenta FBiH“. Navodi da je ovom skupu prisustvovalo oko četrdeset poslanika. Sa žaljenjem konstatuje da načelnici nisu bili prisutni, osim g-dina Mensura Jašarspahića Surijski. Poslanici su izrazili zainteresiranost za saradnju sa Savezom, te istakli potrebu za ponovnom organizacijom ovakvog sastanka. Ističe da je ovo prvi sastanak od planirana tri, te da je organiziran sa poslanicima iz Predstavničkog doma Parlamenta Federacije BiH. Naredna dva će biti organizirana sa delegatima iz Doma naroda Parlamenta FBiH i predstavnicima Vlade Federacije BiH. Navodi da je slijedeći sastanak sa parlamentarcima planiran za 3 mjeseca.

**Informacija je primljena k znanju.**

**g) o održanom seminaru na temu: „Primjena upravnog postupka“**

G-đa Travljanin informiše o održanom seminaru na temu: „Primjena upravnog postupka“.

Predavač na seminaru je bio g-din Mensur Hadžimusić, pomoćnik direktora u Uredu Vlade

Federacije Bosne i Hercegovine za zakonodavstvo i usklađenost sa propisima Evropske unije, a organiziran je za članice Saveza.

**Informacija je primljena k znanju.**

## 7. Tekuća pitanja

### a) Informacija o formiranju Radne grupe za izmjene i dopune Zakona o principima lokalne samouprave u FBiH

G-đa Imširović-Bolić informiše da je Savez iz jednog dopisa koji je zaprimio od Federalnog ministarstva pravde saznao da je formirana Radna grupa za izradu izmjena i dopuna Zakona o principima lokalne samouprave u Federaciji Bosne i Hercegovine. Nakon intervencije, dobili smo informaciju da će ministar Mikulić uputiti dopis Savezu za imenovanje predstavnika Saveza u ovu Radnu grupu.

**Informacija je primljena k znanju.**

### b) Zakon o zaposlenicima u organima jedinica lokalne samouprave

G-đa Imširović-Bolić informiše da je Savez, neposredno pred održavanje današnje sjednice, dobio informaciju da je u petak Zakon o zaposlenicima u organima jedinica lokalne samouprave ispred Federalnog ministarstva pravde upućen prema Vladi Federacije Bosne i Hercegovine.

**Informacija je primljena k znanju.**

### c) Posjeta porodici Čenanović

G-đa Travljanin predlaže da, u skladu sa ranijim zaključkom Predsjedništva Skupštine, delegacija Saveza posjeti porodicu Čenanović do kraja ove godine.

Tokom rasprave predloženo je da u posjetu idu g-din Alilović, g-din Smajlović i g-din Ramović.

**Jednoglasno je usvojeno da se aktualizira odluka od 19.05.2011. godine broj 260/11, te da g-đa Travljanin organizira posjetu porodici Čenanović.**

### d) Informacija po Zaključku Kolegija općinskih načelnika Unsko-sanskog kantona, a u vezi sa Uredbom o građevinama i zahvatima od značaja za USK i građevinama, djelatnostima i zahvatima koji mogu u znatnoj mjeri uticati na okoliš, život i zdravlje ljudi

G-din Hajder informiše da se na sastanku Kolegija općinskih načelnika Unsko-sanskog kantona održanom 12.12.2011. godine u Sanskom Mostu dugo raspravljalo o Uredbi o građevinama i zahvatima od značaja za USK i građevinama, djelatnostima i zahvatima koji mogu u znatnoj mjeri uticati na okoliš, život i zdravlje ljudi. Navodi da je Unsko-sanski kanton donio Zakon o prostornom planiranju i građenju Unsko-sanskog kantona u kojem je stvoren prostor za donošenje spomenute uredbe. Ističe da je ugrađena odredba na osnovu koje kanton za svaku korisnu površinu veću od 2000 m dodjeljuje urbanističku saglasnost i građevinsku dozvolu, te ubire sve pripadajuće naknade. Kolegij općinskih načelnika je donio određene zaključke među kojima navodi zahtjev da Vlada USK navedenu Uredbu ne objavljuje u Službenom glasniku USK, te da na narednoj sjednici povuče odluku o usvajanju ove Uredbe. Također navodi mogućnost obraćanja Ustavnom sudu Federacije BiH u vezi sa ovim problemom.

**Informacija je primljena k znanju.**



Nakon što je konstatovano da su sve tačke Dnevnog reda iscrpljene, g-din Alilović zatvara Sedamnaestu sjednicu Predsjedništva Skupštine Saveza u 15:18 sati.

Predsjednik Predsjedništva Skupštine  
Vlado Alilović, s.r.